



## **KENYATAAN AKHBAR OLEH KETUA AUDIT NEGARA**

### **BERKENAAN:**

### **LAPORAN KETUA AUDIT NEGARA MENGENAI PENYATA KEWANGAN KERAJAAN NEGERI DAN PRESTASI KEWANGAN AGENSI NEGERI MELAKA TAHUN 2018**

1. Pengauditan Penyata Kewangan Kerajaan Negeri Melaka dilaksanakan selaras dengan Seksyen 5(1)(a) Akta Audit 1957 yang menghendaki Ketua Audit Negara mengaudit akaun persekutuan dan negeri. Perkara 107 (1) Perlembagaan Persekutuan menghendaki Ketua Audit Negara mengemukakan laporannya kepada Yang di-Pertuan Agong yang hendaklah menyebabkan laporan itu dibentangkan di hadapan Dewan Rakyat. Perkara 112(A) Perlembagaan Persekutuan pula menyebut laporan tersebut hendaklah dibentangkan dalam sidang Dewan Undangan Negeri Melaka setelah mendapat persetujuan Tuan Yang Terutama Yang di-Pertua Negeri Melaka.
2. Laporan Ketua Audit Negara (LKAN) Mengenai Penyata Kewangan Kerajaan Negeri dan Prestasi Kewangan Agensi Negeri Melaka Tahun 2018 telah dibentangkan di Dewan Rakyat pada 4 November 2019, setelah diperkenankan oleh Kebawah Duli Yang Maha Mulia Seri Paduka Baginda Yang di-Pertuan Agong. Seterusnya LKAN telah mendapat persetujuan Tuan Yang Terutama Yang di-Pertua Negeri Melaka untuk dibentangkan di Dewan Undangan Negeri Melaka pada 18 November 2019.
3. LKAN pada kali ini antara lainnya mengandungi perkara-perkara penting seperti berikut:

#### **3.1. Pengesahan Penyata Kewangan Kerajaan Negeri**

Pengauditan terhadap Penyata Kewangan Kerajaan Negeri Melaka Bagi Tahun Berakhir 31 Disember 2018 adalah untuk memberi pendapat sama ada penyata tersebut menunjukkan kedudukan kewangan yang benar dan

saksama serta rekod perakaunan yang berkaitan telah diselenggarakan dengan teratur dan kemas kini. Pengauditan yang dijalankan mendapati Penyata Kewangan Kerajaan Negeri Melaka telah diberi Pendapat Tanpa Teguran. Penyata kewangan tersebut telah menunjukkan gambaran yang benar dan saksama tentang kedudukan kewangan kerajaan negeri dan rekod perakaunan telah diselenggarakan dengan teratur dan kemas kini.

### **3.2. Analisis Kewangan Kerajaan Negeri**

- a. Jabatan Audit Negara di samping mengesahkan penyata kewangan kerajaan negeri, juga membuat analisis terhadap kedudukan kewangan kerajaan negeri.
- b. Analisis Audit berdasarkan kepada Penyata Kedudukan Kewangan, Penyata Penerimaan dan Pembayaran Wang Tunai, Penyata Prestasi Kewangan, Penyata Akaun Memorandum dan Nota Kepada Penyata Kewangan, mendapati kedudukan kewangan kerajaan negeri adalah stabil.
- c. Secara keseluruhannya, baki Kumpulan Wang Disatukan pada akhir tahun 2018 mencatatkan penurunan sejumlah RM29.39 juta atau 29.6% kepada RM69.86 juta pada tahun 2018 berbanding RM99.25 juta pada tahun 2017.
- d. Akaun Hasil Disatukan pada tahun 2018 menunjukkan defisit berjumlah RM13.86 juta berbanding defisit berjumlah RM22.81 juta pada tahun 2017. Defisit semasa ini berpunca daripada perbelanjaan mengurus yang berjumlah RM380.86 juta melebihi hasil kerajaan negeri berjumlah RM367 juta. Dengan ini, baki Akaun Hasil Disatukan pada akhir tahun 2018 menunjukkan peningkatan defisit kepada RM91.38 juta berbanding RM77.52 juta pada akhir tahun 2017. Kutipan Hasil meningkat sejumlah RM31.67 juta atau 9.4% kepada RM367 juta berbanding RM335.33 juta pada tahun 2017.
- e. Jumlah hutang awam menurun sejumlah RM3.60 juta (0.4%) kepada RM839.69 juta berbanding RM843.29 juta pada tahun 2017. Tunggakan bayaran balik hutang awam oleh kerajaan negeri

meningkat sejumlah RM56.69 juta kepada RM516.67 juta pada tahun 2018 berbanding RM459.98 juta pada tahun 2017.

### 3.3. Penyerahan, Pengesahan, Pembentangan Penyata Kewangan dan Prestasi Kewangan Agensi Negeri

- a. Mengikut Seksyen 5(1)(c), Akta Audit 1957, Ketua Audit Negara mempunyai kuasa untuk mengaudit penyata kewangan agensi negeri iaitu Badan Berkanun Negeri (BBN), Pihak Berkuasa Tempatan (PBT) dan Majlis Agama Islam (MAI). Objektif pengauditan adalah untuk memberikan pendapat terhadap penyata kewangan agensi negeri sama ada penyata ini menggambarkan kedudukan yang benar dan saksama serta rekod perakaunan yang berkaitan telah diselenggarakan dengan teratur dan kemas kini.
- b. Setakat 15 Oktober 2019, bilangan penyata kewangan yang perlu diaudit dan telah disahkan adalah seperti berikut:

<b>BIL.</b>	<b>PENYATA KEWANGAN</b>	<b>BILANGAN PENYATA KEWANGAN TAHUN 2018</b>	<b>PENSIJILAN SETAKAT 15.10.2019</b>
1.	Badan Berkanun Negeri	11	11
2.	Pihak Berkuasa Tempatan	4	4
3.	Majlis Agama Islam Negeri	1	1
<b>JUMLAH</b>		<b>16</b>	<b>16</b>

- c. Daripada 16 penyata kewangan agensi negeri tahun 2018, sebanyak tiga (3) penyata kewangan telah diberikan Pendapat Tanpa Teguran. Sebanyak tiga (3) penyata kewangan telah diberikan Pendapat Tanpa Teguran dengan *Emphasis of Matter* dan 10 penyata kewangan telah diberikan Pendapat Berteguran.
4. LKAN Mengenai Penyata Kewangan Kerajaan Negeri dan Prestasi Kewangan Agensi Negeri Tahun 2018 bagi Negeri Melaka dijadual dibentangkan di hadapan Dewan Undangan Negeri Melaka pada 18 November 2019. Oleh itu, LKAN ini akan

dimuat naik di laman web Jabatan Audit Negara pada tarikh yang sama. Orang awam boleh melayarinya di alamat <http://www.audit.gov.my> mulai 18 November 2019 selepas jam 10.00 pagi. Sebarang pertanyaan lanjut/pandangan mengenai Laporan tersebut bolehlah dialamatkan kepada [Warkah Untuk Ketua Audit Negara](#).

Ketua Audit Negara  
Malaysia

18 November 2019